

INSIGNIVM GESTORVM  
S: ANTONINI  
MARTYRIS  
PLACENTIAE TVTELARIS

ALIORVMQ. SANCTORVM, QVORVM


Sacra Pignora in eiusdem Diui Martyris celeberrimo  
Templo asseruantur,

Et præcipuorum ipsius Templi ornamentorum, ac Priuilegiorum.

S E R I E S

*Breuitè descripta, & ex veteribus monumentis deprompta*

A PETRO MARIA CAMPO PLACENTINO  
eiusdem insignis Templi Canonico.



PLACENTIAE, Apud Ioannem Rezechium, MDCIII.

---

Superiorum permissu.





AD ILLVSTRISSIMVM,  
ET AMPLISSIMVM

S. R. E. C A R D I N A L E M  
D. D. Petrum Aldobrandinum

IACOBI ANTONII TOVERARII.



INTER Purpureos rutilas qui nomine Patres,  
Quæ proferi Campus, munera sume PATER  
Hic ANTONINI decoratum sanguine Tem-  
plum,  
Cælicolùm cernes, donaq; Pontificum:  
Imperium, Regnumq; capit brevis iste libellus,  
Nobiliumq; vigent hic monumenta virùm.

Clareat hinc igitur tanto maiestatis honore  
ALDOBRANDINIS clarior auspitijs.

AD PLACENTINOS  
CIVES EIVSDEM.



QUAE latuere diu, vobis en ordine, CIVES,  
Cælicola innititi prisca trophæa patent.  
Illius exiguo CAMPVS præconia campo  
Muneribus sacris accumulata notat.  
Clara nitent, magis astit, orbis dum splendor in  
ipsis

ALDOBRANDINI sidera sena micant.  
Gaudeat his hilari generosa Placentia vultu;  
Quæ tantis digna est laudibus vsq; frui.

A 2 IOAN-



IOANNIS BAPTISTAE MORI  
CLERICI PLACENTINI.



ACCIPITE, ò CIVES, violas, & lilia,  
CAMPV'S

Quæ spargit, campo munera digna suo.  
Hic ANTONINI (nostra qui prasidet Vrbi)  
Abdita iam dudum facta notanda virent.  
Inclytæq; Heroum veterum præconia florent,  
Nec non Semideum fortia gesta Ducum.

Istius ipse metes campo, nâ CAMPE, laboris  
Et famam, & laudem, clara trophæa, decus.

AD D. ANTONINVM  
PETRI BONACVRSII

CREMON. CARMEN.



QVAM tibi firma fides, pietasq; infusa sequenti  
Castra (nouum) quanta religione nites.  
Tu media Europa, Thebæis ductus ab oris,  
ANTONINE acer, clara trophæa refers.  
Sed uni, Antistes, animosq; Gallia testes,  
Villicres soliti sæpe videre manus.  
Clavio at virtus fulsit, dum castra perosus

Infanda, Idolis reddere sacra negas.  
Hinc cedens, Solymas, Asiam, & loca multa pererras.  
Atq; iterum Trebiæ nota fluenta petis.  
Pro CHRISTO casus, caelesti sede receptus,  
Vrbe Placentina Templâ dicata tenes.  
Supplicis & Populi bonus audis vota, precesq;  
Fers & opem cunctis, auxilioq; inuas.



# PETRVS MARIA CAMPVS.

AD LECTOREM.



QVSCVLVM hoc ab eo cepisse exordium, quod in prima statim fronte perspicies, ne ante quæso, demireris, Candide LECTOR, quàm quæcunq; hîc de Diui ANTONINI gestis, nostræq; Basilicæ splendore, magnificentia, & amplitudine ex veteribus monumentis digesta sunt, planius cognoueris esse deprompta, & celebrata tantummodo, vt in publica Tabula proponeretur ad intimæ pietatis ardorem in eorum ipsorum mentibus, qui eandem sacratissimam Basilicam religionis ergo inuifunt, vel excitandum, vel augendum: licet assiduus postea piorum hominum precibus exoratus, ac victus facere minimè potuerim, quin etiam typis publicis eadem illa ad ver-

bum promulgarentur, cum ad maiorem Fidelium commoditatem, tum etiam ad Diui Martyris nostri nomen latius diffundendum. Ac, ne qua insuper à te ipso desiderari posse videatur libelli in primis nuncupatio, hunc quoque à me eidem Amplissimo, Illustrissimoque D. D. PETRO CARDINALI ALDOBRANDINO, cui longiorem Vitæ ipsius Sancti ANTONINI, totiusque martyrij, & inclytè gestorum narrationem Italica lingua editam libentissimè dicaui; iam simul dicatum, & consecratum esse scias, velim. V A L E.



INSI-

INSIGNIVM GESTORVM  
S. ANTONINI  
MARTYRIS

PLACENTIÆ TVTELARIS  
ALIORVMQVE SANCTORVM,  
quorum Sacra Pignora in eiusdem D. Martyris  
celeberrimo Templo asseruantur,

*Et præcipuorum ipsius Templi ornamentorum,  
ac Privilegiorum.*

S E R I E S

Breuitè descripta, & ex veteribus monumentis deprompta.

A PETRO MARIA CAMPO Placentino eiusdem  
insignis Templi Canonico.



CIVIS, AMICE, ADVENA.



HEC te operæ pretium esse tabula admonet,  
precibus DEO suppliciter fufis, mox vt hîc  
affiftas, celeberrimiq; huius Templi antiqui-  
tatem, splendorem, Sanctorum Reliquias  
honorificè conditas, monumenta plurima,  
& præclara, insignis Collegij dignitatem,  
amplitudinem, priuilegiorum ornamenta le-  
gendo pernoscas. Nam haud dubiè, & delectationem ex  
antiquitatis cognitione percipies, & pietate affectus ipsam  
Basilicam Diui Martyris ANTONINI Placentiæ Patroni  
titulo miranda ex causa (vt intelliges) insignitam, sanctissimo  
corpore ditatam, patrocinijs assiduitate munitam, memori sal-  
tem, ac religioso animi accessu sæpius, cupidiusque reuises.

A 4 Insignia





9

*Insignia Divi ANTONINI gesta glorioso Martyrij  
triumpho consummata.*



NTONINVS Apameæ ex nobilibus parentibus anno circiter ducentesimo, & septuagesimo humanæ salutis ortus, adolescens illustri Thebæorum legioni ascriptus, Duce glorioso MAVRITIO, militiæ operam dedit. Cum verò impius ille Maximianus Imperator, ducto in Galliam exercitu, in finibus Sedunorū sacrificij causa constitisset, Christianaq; ipsa Thebæorum legio, ne pollueretur, à reliquis copijs illicò auulsa, nullis minis, nullisue terroribus incussis in castra ad Sathanicos ludos, & quàm maximè nefanda sacra redigi potuisset; primò decimus quisque ad supplicium tracti, postea reliqui ferè tam diro spectaculo à CHRISTI confessione minimè deterriti, irruente tyranni exercitu immanissimè trucidati. Ac licet ANTONINVS trini, vniq; DEI cultu tuendo, idolorum adoratione respuenda, Saluatoris nostri fide astruenda, nullo inferior, nullo segnior pellicientem verborum lenitatem eludens, tormentorum sæuitiam contemnens, libentissimè sanguinem, vitamq; profudisset, vltro ceruices daturus, vltro pectus, lateraq; obiecturus; DEO tamen seruante, & ad maiora vocante inclytus miles, vnàq; alij perpauci illæsi, incolumesque inde euasere; alij aliò iter contendentes. Ipse verò ANTONINVS multis peragratissimis regionibus Placentiam peruenit, vbi quàm plurimos, in primisq; Festū Principem, ac ditissimum virum ab idolorum cultu ad Christianæ fidei religionem assidua diuinæ legis enunciatione traduxit. Atque haud ita multò post, adhibito sibi comite Ioanne Placentino Presbytero, in alias etiam orbis terræ partes, & præsertim in sanctissima Hierosolymorum

morum loca peregrinationem piè, ac religiosè suscepit.  
 Verùm Ioanne ipso iam mortuo, & Capharnaum in Vrbe  
 sacrarum literarum monumentis celebrata sepulto, Pla-  
 centiam regressus, eodem adhuc sèquente nefario Impera-  
 tore, cum CHRISTVM ardentius prædicare non desi-  
 steret, eiusq; fides ab infestis, ac insidiosis tyranni satel-  
 litibus variè tentata constantior permaneret; vltro vir San-  
 ctus in Agro Trabani obuiam factus, & ab eis correptus  
 sèquissimè excruciat; ad ripam demum subteifluentis Tre-  
 biæ abscisso, ab ceruicibus capite martyrio feliciter corona-  
 tur 4. non. Iulij. Iâ verò eius corpore à nefarijs hominibus  
 in flumen ipsum Trebiam deiecto, sanguis cum in vnum  
 coactus fluitaret, in vrceo diuina prouidentia per Ange-  
 los collectus vnâ cum capite in nauicula mirabiliter impo-  
 nitur: quæ item ab Angelis duobus in specie Aquilarum  
 per idem flumen deducta ad Festi Principis domum ap-  
 plicuit Vrbi Placentinæ proximam, quæ nunc Templum  
 S. MARIAE de Curtina vocatur. At Festus, Domino in-  
 dicante, agnoscens venerandum ANTONINI caput si-  
 bi destinatum illud idem repetere hospitium, vnde olim  
 diri Imperatoris metu Christianus miles adhuc inter mor-  
 tales degens exclusus fuerat; illicò domum satis, vt fieri  
 potuit, decenter exornat, sacras Reliquias excipit, recon-  
 ditq; exosculans, & præ gaudio illacrymans. Sed & san-  
 ctum Diui Martyris corpus postridie diuino monitu reper-  
 tum, & inde, vbi passus fuerat, ( qui sanè locus millia pas-  
 suum ferè quindecim ab Vrbe nostra distat ) vndis sponte  
 sua cedentibus, sublatum, in eandem domum maxima cum  
 fidelium omnium lætitia deferendum curauit, multa inte-  
 rim mirabilia faciente DEO ad præclaras, & insignes ip-  
 sius Martyris exuias. Procedente verò tempore hisce pi-  
 gnoribus adeò charis, adeò pretiosis à nostræ Religionis  
 hostibus

hostibus idem Festus metuens, qui vel in Corpora Sanctorum tumultibus mandata in dies magis defœuissent, eâ in puteum gratè, religiosèq; composita abdidit, quem hodie quoque contueri est in eadem S. MARIAB Ecclesia: quò maximè siccitatis temporibus Clerus, Populusque suppliciter procedentes ex perantiquo more puteum ipsum aperire consueverunt, & inclyti Martyris deprecatione aridam terræ faciem opportuno imbri perfundi sæpissimè animaduertunt.

*Eiusdem Diui venerabile corpus à Beato Savino  
DEI monitu inuentum.*

COMPLURIBVS autem post annis, cum iam ipsum Patroni, & Martyris ANTONINI miraculis clari nomen apud Placentinos celeberrimum esset, ipsius verò sepulcrum adhuc ignotum delitesceret; hoc quoq; à B. SAVINO secundo huiusce Ciuitatis Episcopo (cuius gloriosè meminit S. GREGORIUS Papa in libro Dialogorum) diuina admonitione instructo, cum toto Clero, ac magna Populi veneratione effossa terra inuentum est; indeq; Martyris gloriosum corpus, & caput à corpore abscissum vnà cum vasculo recenti etiam tum sanguine pleno, perinde, ac si paulò ante fuisset infusus, Sanctus ille Præsul in hanc Basilicam Diuo VICTORI Martyri tunc consecratam transferre studebat, cum non sine miraculo gutta recentioris sanguinis è corpore emanans certissimum martyrij præbuit testimonium: quin etiam, cum vnus tantum ipse adesset Episcopus, sex alij incogniti Antistites ex improviso affuerunt, qui Pontificio ipsi quoq; ornatu venerabiles Reliquias ab sefe cohonestatas Nouembris Idibus summa cum religione condiderunt in tumulo S. VICTORIS primi Placentiæ Episcopi, & Confessoris, eiusdem ipsius Basilicæ

Basilicæ conditoris, qui antea viuens inter cetera v<sup>o</sup> iritutum insignia, etiam diuino spiritu afflatus prædixerat post suum obitum fore, vt maior se in eodem illo tumulo collocaretur. Quocirca eius ossa Martyri ANTONINO digniore loco repenrè, omnibus, qui tum aderant, aspicientibus & stupentibus, concesso, in urnæ suæ partem sese recepere: ex quo etiam tempore hæc ipsamet Aedes S. ANTONINI Martyris cæpta est nuncupari. Quòd si quis huius Sancti vitam, martyrium, & miracula nosse velit, Petrum Natalem adeat, qui ea in Catalogo Sanctorum, licèt perangustè, describit lib. 8. cap. 133. Qui quidem non video, quamobrem eiusdem libri cap. 24. ea ipsa, quæ de mirabili Angelorum obsequio, & cymbæ appulsu memorata sunt, alteri eiusdem nominis Sancto Martyri attribuat, reclamantibus præsertim antiquis admodum huius Ecclesiæ manu exaratis Codicibus, & veteri Placentino Breuiario, in quibus hæc eadem, plurimaq; alia Diui Martyris inclytè gesta fusius explicantur, atque permultis depictis tabulis, vetustioribusque picturis, quæ tum hæc, tum alibi extant, magis, ac magis confirmantur. Quæ postea non inconcinne celebrata Heroico carmine complexus est Franciscus Bernardinus Cypellarius in suo Panegyrico Diui ANTONINI Martyris, sapphico autem, adonioq; versu Federicus Scotus Comes, & Patritius Placentinus summatim refert in princ. lib. 5. carminum. Multa præterea huc pertinentia petant per otium, qui cupiunt, ex Commentarijs, quos Italica lingua eleganter conscriptos edidit Gulielmus Baldesanus à Carmagnola Theologus de sacra Thebæorum Historia.

*Antiquissima Basilicæ extructio, & consecratio.*

EXTRUCTA est autem, & consecrata hæc sancta, & insignis

inſignis Baſilica à S. VICTORIS primo ( vt diximus ) noſtræ Ciuitatis Epifcopo in meridiana, vt iam viſitur, plaga ſtatim extra Vrbis murum; verum aucta Vrbe ipſam mœnibus incluſam Placentinus Populus ad maiorem ſimul DEI gloriam, ac Patroni ſui honorem, ampliorem multò, & auguſtiorẽ fecit. Quam deinceps immani Barbarorum feritate ſæpius combuſtam, ac penè dirutam ſanctę memorię Sigefredus noſter eo tempore Epifcopus eius no-



minis ſecundus miro opere excitauit, & in hanc ampliſſimi Templi formam redegit, vt ex eius diplomate perſpicuum habetur, anno Domini 1014. Atque eandem ſemel, ac iterum inſtauratam Canonici ea parte, quæ Chorus vulgò dicitur, nouiſſimè adauxerunt anno 1562.

*Fidelium donationes, priuilegiaq; , & prædia huic loco  
ab Imperatoribus, Regibus attributa.*

HANC porro Baſilicam varijs Fidelium munuſculis ab initio ornatam fuiſſe planè ſignificant multæ, & publicæ,  
quæ

quæ in Tabulario, siue ( vt hodie loquimur ) in Archiuo  
 extant antiquissimæ donationum literæ ; sed vt ad summam  
 gloriam eueheretur, amplioribus postea bonis, possessioni-  
 bus, & prædijs attributis, ingentibus quoque thesauris (qui  
 mox anno 1164. in Germaniâ ab Arnaldo Barbauara Ger-  
 mano Placentiæ Prætoris a portati fuere ) opulentis mune-  
 ribus, & multis priuilegijs concessis, hanc ipsam valde di-  
 tarunt, auxeruntq; quondam Serenissimi Imperatores. &  
 Reges, qui sua ita demum Regna plurimû propagari posse  
 sibi persuadebant, si sacrarum Aedium tutores extitissent,  
 earumq; prædia ex omni parte maioribus quotidie incre-  
 mentis dilataissent. Quæ causa quoq; fuit CAROLO MA-  
 GNO illi sanctissimo Imperatori anno 774. cõmmandi vbi-  
 que Episcopis, Canonicis, & Abbatibus veteres Ecclesia-  
 rum, ac Monasteriorum possessiones à Longobardis, alijs-  
 ue ante concessas, & nouas eisdem attribuendi: qui qui-  
 dem multa propterea illis ipsis temporibus huic etiam Tẽ-  
 plo donauit, vt patet ex eorum omnium confirmatione  
 postea à Ludouico ipsius Caroli filio, eodemq; religiosis-  
 simo Imperatore obtenta imperij sui anno sexto, V. Cal.  
 Maij, indictione 12. Quod item fecit Carolus Tertius co-  
 gnomento Crassus Imperator, (cuius soror Angilberga Lu-  
 douici consanguinei sui Imperatoris coniux nobile S. Sixti  
 in Vrbe nostra Fanum ædificauit, dotauitq;) qui in CHRIS-  
 TI gratiam, Venerabilisq; Luituardi Episcopi Archican-  
 cellarij sui rogatu Templum hoc, Canonicos, & bona S.  
 ANTONINI non solum in fidem suam recepit, commen-  
 datissimaque habuit, sed etiam donationes, ac priuilegia  
 omnia, quæcunq; fuerunt eisdem tam per proauum suum  
 Carolum Magnum, quam per alios Augustissimos Cæsa-  
 res, auum Ludouicum, D. Lotharium patruum, maximè  
 verò per gloriosissimum, atq; inuictissimum Imperatorem  
 Ludoui-

Ludouicum consanguineum concessa benignè constabiliuit. Munera quoque, & omnes Regum Longobardorum Luitprandi, ac Desiderij ingentes donationes ( quorum omnium diplomata simul cum tota Vrbe incendijs olim consumpta fuisse ipse testatus est ) non inuitus comprobauit, & omnino corroboreari voluit; permagna denique alia prædia pro Lotharij quondam benignissimi Regis, & Imperatoris manibus expiandis ita gloriosè, vt gratè addidit in Castellana, Solarolo, & alijs Placentinis pagis, de quibus in eodem Archiuio ad perpetuam rei memoriam tria habentur priuilegia publicis consignata monumentis, primum Papiæ datum, 5. Idus Maij, alterum item Papiæ Idibus Nouembris, tertium Placentiæ 5. Cal. Ianuarij indictione 14. anno Incarnationis Domini 881. imperij ipsius Caroli 1. regni in Francia 5. in Italia 2. Hugo etiam & Lotharius Italiæ Reges, Placentiæ cum essent, anno eiusdem Incarnationis Domini 943. Regni Hugonis 17. Lotharij 13. indictione prima, quæ, & quanta concesserint ex eorū priuilegio dato 5. Idus Martij notissimū est; memores namque, & grati animæ aui sui Lotharij Imperatoris, cuius corpus in hac eadem Basilica humatum quiescere ipsi Reges perspicuè affirmarunt, libenter eleemosynæ nomine, ac pro Lotharij, animarumq; suarum salute sortes duas (sic enim amplissima prædia appellabant) in Villis Gabiani, & Fabricæ condonarunt, aliam item in Flabiano adijcentes pro anima Petri cuiusdam strenuissimi militis, qui ob summam fidelitatem suam sub moenibus Placentinæ Urbis interierat, in atrio eiusdem Basilicæ sepulti: præterea verò donationes omnes, & iura ( id quod ante Hugo solus Papiæ 15. Cal. Maij anno 931. Sigefredi Placentiæ Episcopi, & Consiliarij sui precibus præstiterat ) priuilegiaque omnia sacræ huic Aedi ab Imperatoribus Carolo, Lothario,

rio, cæterisq; Regibus, nec non ab alijs quibuscunque religiosis, & DEVM piè timentibus viris collata vel conferenda, rata omnino, & grata habuere, atq; etiam ipsius Sacerdotum, & Cleri patrocinium strenuè susceperunt. Rogati pariter ipsimet Inuictissimi Reges à Bosone Placentino Præfule Archicancellario suo 17. Cal. Martij, 944. mansum ( vt tunc ingentem fundum vocabant ) in Ancharano eidem largiti sunt Ecclesiæ. Otho Tertius itidem Augustissimus Imperator innumerabilibus alijs concessionibus ipsam decorauit, & ornamentis plurimis ditauit, vt planè constat ex eius publici priuilegij documento 14. Cal. Februarij, 997.

*Diuerse Placentinorum Episcoporum donationes.*

HANC verò tantam, tamq; magnificam liberalitatem, & eximiam Regum, ac Principum pietatem imitati complures sanctæ Placentinæ Sedis Episcopi huic eidem loco plurima suæ Mensæ bona & iura gratissimè attribuerunt, vt de Sigulfi Episcopi iam olim donatione planius compertum est, anno 981. ac etiã de præcipua illa semper commemoranda, nunquam satis dignè commendata Sigefredi secundi beneficentia, qui post Templum à se ( vt diximus ) restitutum, & consecratum 1014. tot, & tanta eidem prædia, tamque magnos redditus munificentissimè donauit, eiusq; Fabricæ ( modò Cooperturam appellant ab honorifico plumbearum regularum tecto, quo hæc vna apud nos Aedes decoratur ) nominatim destinauit. Quæ omnia Petrus, Aigardus, Iuo, Guido, Dionysius, Arduinus, Tedaldus, Arditio, Bernardus, & alij plurimi, qui successerunt in Episcopatu, libentissimi omnes profectò confirmarunt, compluribusque alijs bonis de sua mensa sublatis concessionibus Superiorum valde amplificarunt.

Priuile-



*Privilegia item plurima, & præclara Romanorum Pontificum.*

Hv c etiam accedit, quod Summi Romani Pontifices, quorum omnium privilegia fideliter asseruantur, Innocentius, ac Cœlestinus Secundi, Eugenius Tertius, Adrianus Quartus, Alexander, Lucius, Urbanus, Clemens, Cœlestinus, Innocentius, & Honorius Tertij, Gregorius Nonus, Innocentius, & Alexander Quarti, Innocentius Octavus, Iulius Secundus, Leo Decimus, Clemens Septimus, & alij permulti, quos longum est commemorare, Apostolicæ suæ auctoritatis dexteram hisce gratijs, hisce concessionibus tendentes, huius Collegij Præposito, & Canonicis præter alias prærogativas perpetuam donarunt iurisdictionem, & dominatum in multis Placentinis Ecclesijs, in primisq; in S. *MARIÆ* de Curtina propè ipsam Basilicam ad Occidentem, præcipuè ob reuerentiam eiusdem S. Martyris nostri, cuius sacratissimo Corpore locus ille prius fuerat exornatus. In Ecclesia item Sancti *ANTONINI* loci Plectolarum nuncupati, quæ iam per eundem Dionysium Placentinum Episcopum pro S. Syri Templo Canonicis ipsis permissa fuerat. Tum in Aede Gragnani Sancti Michaelis appellata, quam item ab optimo olim Placentiæ Episcopo Arduino eius præcipua in hoc Collegium pietate concessam legimus anno 1131. 4. Idus Maij indictione nona: quo quidem in loco Canonici facultate sibi per incolas, & habitatores facta ex publicis Petri Savini Notarii tabulis 1217. Cal. Ianuarij Consules quætorinis legere consueverunt. Roncaliæ etiam (ubi tot leges ab antiquis Imperatoribus latas memoriæ proditum est) in Ecclesia S. Bartholomæi, quippe quæ per Canonicos ipsos in fundo iuris S. *ANTONINI* à fundamentis constructa sit anno circiter 1135 atque ibi quoque solebant à Canonicis Consules singulis annis eligi.

Hos insuper Canonicos supremi ipsi Pontifices alijs singularibus honoribus decorarunt, eis non solum integram Præbendarum huius Ecclesiæ collationem referuando, & conseruando; verum etiam omnem confirmando iurisdictionem, ac plenam potestatem cum iure institutionis, correctionisq; in Plebe, sacris Aedibus, & Sacellis, siue (vt nunc aiunt) Capellis Burgi Vallistarri; quæ etiam eisdem præsentè, assentienteq; Oberto Bobiensi Episcopo (quem admodum ad ipsos Canonicos; non ad eius Ecclesiam spectare dicebantur) adiudicata fuisse publicis consignarunt documentis Ioannes Tabernarius ad Alcherij notarij schedam 8. Idus Iulij 1221. Gulielmus Cognus, & Petrus de Mezano 8. Idus Maij, & 7. Cal. Octobris 1222. In Burgi Aede, quæ ibi primum locum nunc obtinet, Archipresbytero, & Collegio ornata, per ipsos Burgenfes titulo, & ad honorem S. Martyris ANTONINI condita 1226. 3. Cal. Aprilis ex probato Iacobi de Bardo notarij testimonio, Anfaldus de Carrio eo tempore hîc Præpositus solenni ritu Crucem immisit, fixitq; ad Orientem, quâ quidem antiqui Burgi murus continens erat. Statuta quoque, ac leges ad moderandos illorum Clericorum mores Collegiū hoc sæpius, & præsertim 3. Idus Septembris 1340. sancit, ex publico Michaelis Mussi notarij documento.

Ad extremum mandarunt Sanctissimi Romani, quos proximè recensuimus, Pastores hanc ipsam Basilicam cum Clericis, ac rebus, & bonis omnibus etiam in posterum acquirendis, priuilegijsq;, & immunitatibus suis sub Apostolicæ sedis præsidio, & amplissima tutela factâ rectâ perpetuò seruari, ab homine nemine perturbari, eorūq; possessiones, & prædia minimè auferri, seu ablata retineri, minui, decimarumue exactione grauari, nec alias vllas ipsis molestias inferri; sed integrâ, & illibata omnia eisdem

2011

U

conser-

conseruari, ad quorum vsus necessarios omnino concessa esse testatur est.

*Sanctorum Corpora, sacraq; Reliquiæ honorificè condita.*

QVOD autem ad Sanctorū Corpora attinet, quæ hâc fœpulta sanctè veneramur, & colimus; in primis duo sub maximo Altari in vno, eodemq; tumulo honorificè sunt condita, scilicet anteriori parte Ossa; Corpusuè ipsum S. Martyris ANTONINI Placentiæ Patroni: cuius martyrij Festus diès, arque solennis 4. nonas Iulij, Inuentionis autem Idibus Nouembris summa celebritate peragitur. In posteriori verò Corpus S. VICTORIS primi Placentiæ Episcopi, & Confessoris doctrina, & vitæ sanctitate olim conspicui, cuius etiam celeberrima Natalitia 7. Idus Decembris coluntur; quemadmodum & eiusdem huius Tēpli anniuersaria Dedicationis diès 4. Idus eiusdem mensis Decembris celebratur. Hæc duo ipsorum Sanctorū Corpora Fabio Cupallata Placentino Episcopo Laquedonensi recognita anno Domini 1562. maximaq; cum Cleri, ac Populi religione culta fuisse testatur Marci Antonij Ripaltæ Notarij, & nobilis Placentini Cuius publica documēta 15. 14. & 5. Calen. Decembris eiusdem anni 1562. confecta.

In eo etiam Altari subter lapidem magnū superiorem asseruantur nonnullæ S. IACOBI Apostoli Fratr̃is Domini; Sanctorum item STEPHANI Protomartyris, LAURENTII, SIMPLICII, & FAUSTINI, CHRISANTHI, & DARYAE, NEMESIUS, & LUCILLAE Martyrum, ac S. OPILII Confessoris Reliquiæ in plumbea; & decenti vniula repositæ per Illustrissimū ac Reuerendiss. PHILIPPUM Segam olim Placentinum Episcopum, mox etiam S. R. E. Cardinalem

ipſo eiudem Altaris conſecrationis die, qui dies fuit 8. Idus Maij 1583. ex publica Franciſci Tarauelli Fraterni notarij chartula.

Subproximo Natalis Beatiffimæ Virginis MARIAE, quod etiam Sanctis Nicolao, Caſto, & Deſiderio dicatum eſt, ad dextrum cornu (id eſt Euangelij) principis Aræ extructo, Corpora Sanctorum CASTI, & DESIDERII Martyrum conqueſcunt, multis iam abhinc ſæculis eò translata, & condita, quæ nuper Illuſtriſſimo, Reuerendiſſimoq; CLAUDIO Rangono Placentiæ Epifcopo ibidem inuenta, & in plumbeo loculo honeſtius collocata ſunt 8. Cal. Decembris 1599. duobus hac de re publicis extantibus monumentis eo die per optimos viros Antoninum Mareſcalcum, Dominicumq; Malchiodum Notarios conſcriptis. Ex huius S. DESIDERII oſſibus aliquas inſignes particulas deſumptas à Collegio hoc de S. Sedis Apoſtolicæ facultate, Vniuerſitas, & homines Caſtrionoui Scriptoriæ Dertonenſis Dioceſis obtinuerunt anno Sanctiſſimi Iubilæi 1600. qui cum ipſum Sanctum yti Tutelarem, & Patronum colant, eandem ad ſuam Parochialem Sancti DESIDERII Eccleſiam tam honorificè, quàm hilarè deferendas curarunt, binis item hac de re publicis tabulis apparentibus nobilis viri Ioan. Petri Dordoni notarij, alteris 3. Cal. alteris verò Cal. ipſis Decēbris eiudem anni 1600. Paſſi ſunt S. Martyres, CASTVS in Africa pro CHRISTI nomine multa, & grauia expertus, ſupplicia, qui denique martyrium igne compleuit. DESIDERIVS autem Lingonienſis Epifcopus in Gallia (Honorio, & Theodoſio Imperatoribus) qui cum plebem ſuam diutiffimè obſeſſam ab exercitu Vandalorum impiè diuturnari conſpiceret, murum ipſum Vrhis conſcendens, iracundia tyranni ſæpius ſe obiectans, gladio tandem obtruncatus

truncatus pro grege suo libenter, & alacriter mori non ex-  
timuit. Eorum quoq; sancta, & celebris memoria, licet  
alibi martyrij die coli videatur, CASTI scilicet XI,  
DESIDERII autem IO. Cal. Iunij, apud nos tamen  
vno, eodemq; die, pridie Cal. Octobris recolitur; quod  
eo ipso fortasse die eadem Sanctorum Corpora sint hunc in  
locum alias illata.

Sub Altari præterea S. OPILII, olim S. Stephani,  
appellato, quod cernis ad læuam è Templo Occidentem  
versus egredientis, conquiescit Corpus S. OPILII Dia-  
coni Confessoris Placentini ex nobili Ficianorum familia.  
Is sacræ illi Corporis Diui ANTONINI Martyris Inuen-  
tioni præfens Crucem Acolyti more ferebat, qui, vbi VI-  
CTORIS Episcopi ossa Martyri locum cedere inspexisset,  
repente commotus, & diuino calore succensus vitam dein-  
ceps virtutibus, & miraculis gloriosam sanctissimè degit:  
nihil enim aliud, nisi cœlestiacius animus meditabatur,  
tanto huiusce Templi desiderio tenebatur, vt fere nunquā  
discederet ieiunijs, & obsecrationibus hinc DEO seruiens  
diu, noctuque sæpissimè etiam totos dies ieiunus transi-  
gens, quæ pro reficiendis viribus mater illi mittebat, ege-  
nis libentia animo elargiebatur, cibo alio longè præstantio-  
ri, pia meditatione, & assidua sacrarum literarum lectione  
usus: Aegrotos autem sanauit, Dæmones ex hominum  
corporibus eiecit, aliaque multa mirabiliter egit, quibus  
illius sanctitatem notam DEVS esse voluit: denique bo-  
norum operum meritis cumulatus, cum etiam à MAVRO exi-  
mix sanctitatis Episcopo Placen. Diaconus factus fuisset,  
quieuit in Domino 4. Idus Octobris. tota facie mirum  
in modum radiante, eiusq; corpore suauissimum odorem  
spirante. Quo etiam die nos Sancti huius Natalitiam solenni-  
tatem celebramus, eiusdem verò Translationem 6. Idus

Maij, quæ anno 1495. Fabricio Marliano tunc Placentiæ Episcopo summo honore peracta legitur ex publico Georgij Bilegni documento, & ex Sacranij Codice accepti, & expensi illius temporis. S. GALASIVM natu minorem hinc habuit germanum, cuius glorioso corpore Augustissima S. SAVINI Basilica mirificè illustratur.

Ad sunt & aliæ complures certæ diuerforum Sanctorum Reliquiæ, quæ in elegantibus ad id comparatis thecis reconditæ solenni pompa præcipuis festis diebus exponuntur Populo venerandæ.

Adest item PARS Brachij cum manu, & digitis pueri ex SS. Martyribus Innocentibus ab Herode crudelissimo Rege interfectis, quæ in anniuersaria eorum solennitate à Fidelibus summa cum religione colitur.

Vna etiam ex SPINIS Coronæ D.N. IESV CHRISTI, quam in maiori Hebdomada post absolutum Matutinum 5. Feriæ per Vrbem amplissimo honore delatam nō modò Clerus huic Templo addictus cum albis funalibus, & choro Musicorum, sed etiam Populus frequens piae ueneratione comitatur. Quam postmodum SPINAM in Altari propositam illis sacris diebus omnes assidue inuisunt, & flexis genibus, lacrymisque profusis adorant. Huiusmodi autem Reliquiarum primas à Bartholomæo Cognō huius Ecclesiæ Canonico 6. Cal. Iunij 1376. alteras ab hæredibus Ioannis Surdi Placentini Vachienfis quondam Episcopi, hocq; ipso in Templo antea ad Præbendam de S. GEORGIO nuncupatam Canonici 5. Nonas Maij 1392. Collegium ipsum reuerenter excepit, vt clarissimis scriptis consignatam memoriam publicam habemus à Benedicto de Filijs Michaelibus, & Antonio Sariano tunc probatis notarijs Placentinis, & huius Ecclesiæ Collegij cancellarijs.

Placen-

*Placentinorum Praesulum, Imperatorum, Regum, & aliorum  
clarissimorum virorum ossa hic  
conquiescentia.*

**I**N hac eadem Aede nouissimam caelestis nuncij tubam expectant quindecim alia Reuerendissimorum Placentiae olim Episcoporum corpora, nempe (vt refert Vmbertus Locatus Placentinus Balneoregienfis aliàs Episcopus in suo libro Chronicorum Placentiae) Auiti, Placidi, Siluani, Ioannis, Seufredi, Syri, Vindemialis, Ioannis Secundi, Catharisini, Donini, Placentini, Ioannis Tertij, Andoardi, Thomae, & Sigefredi Secundi. Hi quidem omnes post S. MAVRVM Tertium Ciuitatis Episcopum, cum Sanctae Placentinae Ecclesiae multos annos praesuisent, eiq; cunctis in rebus maximè profuisent, è vita cedentes hac in Aede Diui Martyris, & Patroni alius alio religiosius humari voluerunt, in quam etiam, dum viuerent, Patres optimi, memores, & grati assiduâ, admirandâq; pietatē prae se tulerant; quippe qui omnes in ea militares Duces, & nobilissimos quosque Ciuitatis, & suburbiorum viros magnâ tum religione tumulis mandatos perspexerant. Ipsorum postea præclaro exemplo Vicedominus Cossadocha, Hugo Pillulus, Rugerius Caccia, Petrus Coconatus, & alij, qui etiam Placentini omnes Episcopi fuerunt, anniuersarijs legatis eandem ipsam Ecclesiam non paucis condonarunt.

Hic praeterea quiescunt Ossa Luitprandi Regis Longobardorum, auctore eodem Locato, quæ, vt etiam acta Ciuitatis antiqua manu scripta testantur, ad gradum ipsum ianuae alterius magnæ in vestibulo, siue (vt vulgò loquuntur) in Paradiso putantur esse condita, vbi magnus lapis oblongus proximis superioribus annis exibat.

Hic deniq; sita sunt Ossa Lotharij quondam pietate celeberrimi Regis, & Imperatoris, qui filius fuit Lotharij pri-

mi, Caroliq; Magnipronepos. Cum enim Roma reuertens Placentiæ obijisset 8. Idus Augusti 869. humatum illum in hac ipsa Basilica plurimis ab ipso bonis donata fuisse certissimum est apud omnes probatos Historicos, in primisq; apud Robertum Gaguinum, Carolum Sigonium, & alios, præter grauissimum, quod supra habemus, testimonium Caroli Crassi Imperatoris, Hugonis, & Lotharij Regum in publicis ipsorum priuilegijs. Ex Placentinis quibusdam vetustissimis actis Lotharij Ossa in arca magna, tumuloue lapideo inuenta fuerunt anno Domini 1471. Iacobo Romano Præposito, quo etiam tempore Templi pauimentum constratum, sedesq; Chori per honorificas, & alteram campanam maiorem (anno post primam quadragesimo octauo) fabricatam accepimus.

*Insignis Canonorum, & collegij dignitas, beneficiorumq;  
ac beneficia obtinenti in nuncupationes,  
& vocabula.*

**Ecclesia hæc insignis, & collegiata, præter Cathedralē** longè ante alias dignissima 15. Canonorum numero, præterea Præposito, qui summum dignitatis gradum obtinet, perornatur. Hi rebus amplissimis aucti multis honoribus gaudenteius olim (vt notum est in Placentino Præsule deligendo habebant, ad maiorem loci amplitudinem, reuerentiamue Almutias (sic enim appellant pelles illas, quibus operam diuinis officijs dantes vtuntur) deferunt, & vt in dignitate constituti ex priuilegio Clementis VII. Pont. Max. vniuersæ Ciuitatis Placentinæ precibus concesso 11. Cal. Aprilis 1524. causas cognoscere, decidere, ac terminare possunt. Ipsorum autem antiquæ Canonicales quindecim Præbendæ, maior, de medio, & media de Gragnano, maior, & minor de Roncalia, vna de S. Georgio,



85

Georgio, aliâ de S. Damiano, reliqtæ de Suzano; Ralio;  
Bigonentio, Furnarina, Potentiano, Burgeto, Lugagna-  
no, & de Valeria, veteribus vocabulis appellantur, omnes  
ex primis illis Fidelium, præcipuisq; Regum, Imperato-  
rum, & Antistitum donationibus olim erectæ, & institutæ;  
Quintadecima excepta, quam Petrus Cardinalis Dianus  
Placentinus, & hîc Præpositus (vt infra dicetur) erexit;  
exceptis item quibusdam alijs Præbendis in antiquarum  
inter se connexarum locum suffectis.

In eodem quoque Templo Mansionarii sex, Capellani-  
que, vel Præbendarii tredecim adnumerantur, qui & ipsi  
ferentes Almutias longè dissimiles Ioannis Cardinalis Sal-  
uiati Placentiæ Legati concessu anno 1525. dies, noctesq;  
diuinis laudibus assiduè, & sanctè inseruiunt. Quorum  
quidem tres primæ Mansionariæ à Capitulo 1247. ex In-  
nocentij IIII. rescripto prima scilicet de Gagnano, altera  
de Puteopagano, & tertia de Zeneureto, nuncupatæ; alię  
quæ sequuntur, quæ ab Arduino, & Bernardo Placentinis  
Episcopis, & sexta à Hieronymo Mazzola Canonico con-  
stitutæ fuerunt: Præbendæ verò vndecim à sanctę recorda-  
tionis GREGORIO DECIMO, de quo infra, nec non  
à Lantellino Odulano, Andrea Zuino, Gulielmo Specti-  
no, Antonio Cossadochia, Manfredo Castignolo, Guliel-  
mo Bagaroto, Romano de Groppodugario, Razione de  
Castronouo, Armano Nicello, & Ioanne Contino Pla-  
centinis omnibus, & huius Ecclesiæ Canonicis; aliæ (quę  
sunt octo aliquibus item annexis substitutæ) à laicis homi-  
nibus Ciuitatis, & populi Placentini erectæ.

*Placentinorum omnium eximia, & singularis pietas  
ergâ Diuum Martyrem Patronum.*

ET ENIM ipsorum Ciuium gratissima semper, & pia  
memo-

memoria extitit erga Martyrem Patronum, & defenforem suum; propterea quòd huic etiam celeberrimæ eiusdem Basilicæ innumerabilia penè legata, plurimosuè anniuersarios redditus quocunq; tempore largiti sunt. Hinc quoque ad perpetuum, ac perennem ipsius Patroni honorem tot Altaria, tot Sacella per eos vbique extructa, Aedæque sacræ còplures eius inclyto nomini dicatæ, & liberaliter dotatæ. Hinc Trabani loco, Macineffij, Montisalti, Bedoniæ, & Burgi Vallistarri quinque præcipuæ Archipresbyterales Ecclesiæ conspiciuntur: in Agro item Plestolarum, Albarolæ, Castilioni, Corani, Ronchi, Vicomarini, Vairaschi, Nibiani, Fenocchieti, Insulæ sub Complano, Siluæ, & Ozolæ, alijsque partibus Placentinæ Diocesis aliæ Parochiales omnes Diuo Martyri consecratæ. Hinc Castrum illud S. ANTONINI appellatum propè mirificam S. Augustini Basilicam a Ciuibus etiam erectum, quod cum nuper annis cesserit, ex Patrum nostrorum memoria nondum deletum est. Hinc denique in ipso egregij Martyris anniuersario die festo, atque solenni, qui mense Iulij (ante diximus) celebratur, tantam videre est Placentini Populi lætitiā, vt omnes ordines, omnes ætates in Domino gestiant, exultent, & Sancti magnitudinem, quoad possint, ore, manu, precibus, & votis declarare conentur. Omnes enim gratiarum ergò ad sacrum hoc, & inuiolabile Asylum summa animi pietate, & religione conveniunt, in primisque maximi Templi amplissimum Collegium ad Vespertinas preces pridie Natalitia, Missam verò ipso Natalitiorum die solenniter decantandam, vnàq; Reuerendissimus Placentinus accedit Episcopus; qui quidem sacrum ipsum officium Pontificali habitu quandoque exornat, thurisque libram ex pio, ac perantiquo ritu, quemadmodum etiam Serenissimi Ducis Quæstor certam pecuniam, quoniam

defe-

deferendam curat : hoc idem faciunt & Illustris Ciuitas  
 vniuersa, & singula Iurisperitorum, Physicorum, Nota-  
 riorum Collegia, mercatorumque, & artium omniū con-  
 uentus: cuncti præterea Ciues, qui pro Populi pace, & con-  
 cordia, rerumque omnium abundantia, & copia certatim  
 vndique confluunt ad sacrosanctas Diui Martyris omnium  
 Patris, & Patroni Reliquias piè, & sanctè colendas, obla-  
 tionesque Aedi, & Altaribus hisce gratissimè præstandas.  
 Atque, vt sancta huiusmodi consuetudo perpetuò retinea-  
 tur, & inuiolate obseruetur, antiquum Placentiæ Statutum  
 in rubrica 32. lib. 1. omnes etiam Villas, & Castra Placen-  
 tina ad illo die afferendum quasdam eleemosynas, & mu-  
 nera impellit; hac item de re in ipso Archiuio apparent Ga-  
 leatii Vicecomitis, olim Virtutum Comitis, Mediolani  
 Ducis, & Placentiæ Domini literæ Mediolani datæ 14. Cal.  
 Septembris 1391. vnà cum eius hac in Vrbe Prætoris Lu-  
 douici Vistarini publico edicto 6. Cal. Iunij 1392. propo-  
 sito; & videri quoq; potest Francisci Sfortiæ similiter Me-  
 diolani Ducis, & Domini Placentiæ rescriptum Vigleuani  
 concessum 13. Cal. Martias 1469. Adolescentes item om-  
 nes, quotquot in Placentinis gymnasijs studio humanita-  
 tis, ac literarum dant operam, militari pompa expediti in  
 equis, eam ipsam Diui Militis, & Martyris ANTONINI  
 præclaram solennitatem varijs, ac diuersis muneribus plu-  
 rimùm augent: nec non orationibus sanè doctis, & orna-  
 tissimis, versibusque elegantissimis in publicum prolatis,  
 eandem omnibus iucundissimam reddunt, & magnopere  
 admirandam. Maiorum etiam morem festo illo die quon-  
 dam fuisse constare veteribus gestis, vt cursoribus in sta-  
 dio maximi pretij Ciuitas ipsa præmiū proponeret; vnde  
 Barnabam Vicecomitem præmiū pretij florenorum auri  
 12. reportasse legimus anno 1372. Similiter in Inuentio-  
 ne

ne eiusdem Idibus Nouembris rerum omnium mercatum quendam publicum, & maximo conuentu celebrem in Vrbe habebant per dies quindecim ex Caroli Magni Imperatoris priuilegio, quod postea comprobatum est à Ludouico ipsius filio anno imperij 6. & à reliquis etiam Imperatoribus, præsertim à Carolo Crasso Imperatore optimo imperij sui anno 1. Idibus Nouembris Incarnationis Domini 881. indiçtione 14.

*Exterarum etiam gentium sanè memorabilis religio,  
& obseruantia.*

VERVM enimuero in tantis Diui Martyris ANTONINI laudibus, atque Templi huius eximia dignitate, honoribusue explicandis, hoc loco illud non queo præterire, non tantum apud nos celebrem esse clarissimi ipsius Martyris memoriam, sed in alias etiam Vrbes, & Orbis terrarum regiones longè eam, latèque diffusam summo in honore, semper habitam. In Urbibus enim Parma, Cremona, & alijs permixtis: in loco Gualdinengo, & in Plebatu Foronoui Cremonensibus Castris: item in Diocesis Bobij ad locum Perducum, & Dertonæ in Pago S. ANTONINI appellato propè Mondondonum, Ciues illi, & incolæ tantuminiis participes iam pridem effecti, propria huic Martyri Tempia & ipsi condiderunt: in quibus etiam eidem Diuo singulis annis ipso die 4. nonas Iulij sacra solennia perfoluentes summa celebritate lætantur, imperatisque Ferijs honestè exultant. Cremonæ autem ciues ipsi ea potissimum ex causa, quod olim à Gallis Vrbe sua expulsi eodem die sese in libertatem vindicarint anno Domini 1522. cærea, quoque dona sacratæ Martyri nostro Aedi, quæ ibi à Præposito custoditur, libenti animo & fidium, & tibiarum concentu deferentes, Sanctum Martyrem sibi Patronum inter

inter alios suos, assiduis, gratisque vobis entunciare non cessant, ut planissimè constat ex Decretis illius Ciuitatis, & ex carmine Camilli Becharæ Præpositi ad Amplissimos Cremonæ Decuriones de Diui ANTONINI Martyrio. Extant & in Regiensi territorio ad Quatuorcastella, item Capergnanicæ apud Cremenfes Ciues, alijsque in Oppidis, & locis antiqua non minus, quàm religiosa sub nomine, & titulo huius Sancti Militis, & Martyris dicata Tempia, licet in illis ipsius anniuersarium diem 4. nonas Septēbris celebrari contingat. In loco autem Barbiani curiæ Ciriiani supra Urbem Parmensem præclara etiam eidem Martyri memoria posita est, quemadmodum & in Oppido Varisio Mediolanensi Diocesi subiecto, ubi præ quædam sacre Virgines admirabili vitæ instituto florentes, in perantiquo coenobio, & Basilica S. ANTONINI nomine extructa, & consecrata propriam ipsius Martyris lectionem, quæ cum nostris penè ad verbum consentit, ex veteri Breviario habent sanctæ Ecclesiæ Mediolanensis: quo utroque in loco eiusdem Diui solenniras Idibus Nouēbris (nempe ipso Inuentionis die) præcipuè agitur.

*Celeberrimi Templi dignitas, & amplitudo.*

Sed, ut redeamus ad nostra, neque illud silentio innotuendum videtur, quod, cum alicui militaria insignia Placentiæ olim conferenda essent, Imperatores, Regesue, aut Duces hac in ipsa Militis, & Patroni Aede id muneris, id dignitatis concedebant, ut de Manfredo Lando milite per Ducem Galeatium Vicecomitem creato tradit Locatus 1314. Quod item Romani Pontifices in suis Apostolicis priuilegijs Templum hoc maximè honorabile, adeò colendum asseuerarunt, ut non alios, nisi dignos, idoneos, & eximia virtute insignes in ipso residere ministros decreret.

Quod

Quod denique ea de causa potissimum iidem illi Pontifices Maximi ex Illustrissimis S. R. E. Cardinalibus plures hoc in loco Canonicos quodam tempore constituendos, aliosue aliquando ex ipsis huius Ecclesiæ Canonicis ad Cardinalitiam, alios ad Episcopalem dignitatem euehdos, putarunt.

*Gregory Decimi Pontificis Maximi antea hic Canonici inelyte gesta.*

NEQUE VERÒ illud omittendum cenſeo, quod admirabile quidem, ſed tamen veriſſimum eſt de Maximo, & ita interris Optimo, vt nunc in coelis Beatiffimo Pontifice GREGORIO DECIMO, cuius grata, & ſancta recordeatione mirum in modum animi noſtri recreantur. Hic antea Tedaldus Vicecomes vocatus, Placentinus, S. ANTONINI Canonicus, annos triginta, & amplius nuncupatam de Lugagnano, Præbendam maximè obtinuit, vti ex publicis patet Notariorum documentis, id eſt, Guidonis de muſſo 8. Cal. Decembris 1239. Alberti de Viloe, Cal. Februarij 1246. ac Rubatut de Atto 14. Cal. Ianuarij 1261. Nonis Ianuarij 1263. & itidem Calend. Ianuarij 1264. Eo interim ſpatio, vrgente grani, & infeſta illa Ffiderici Imperatoris perſecutione in Romanâ Eccleſiam per Gregorium Nonum ad Franciæ, & Germaniæ Regna miſſus cum docto, egregioq; viro Iacobo de Pecoraria Placentino Cardinali, & Epifcopo Præneſtino, Apoſtolice Sedis Legato, multa in illis partibus præclare geſſit, vbi etiam recepit ampliſſimam Archidiaconatus Leodiienſis dignitatē: Epifcopatum verò Placentinum deferente poſtea Innocentio IIII. recuſauit. Sed, cum vir eſſet ſummæ probitatis, & doctrinæ, pacisque amaniffimus, defuncto Clemente IIII. Illuſtriſſimi Patres poſt varias ipſorum per-

bo. d

trien-

triennum ferè in Pontifice substituendo diffensiones, Viter-  
bij tandem anno 1271. coniunctis sententijs, maximeq;  
consilario, & auctore S. BONAVENTURA, eundem Tedal-  
dum in Summum Pontificem elegerunt, quamvis in Sy-  
ria voti causa tum agentem, nec illis omnibus Patribus co-  
gnitum; qui postea GREGORII nomine accepto, Ro-  
mæ Pontificia corona insigniri se voluit. Ab eo in primis  
pace inter Venetos, & Genuenses composita, magnum il-  
lud Lugdunense Concilium generale habemus secundo  
Pontificatus anno celebratum. Quo quidem in Concilio  
Græcorum Ecclesia, præsentè Philippo Franciæ, ac Pa-  
leologo ipsorum Græcorum Imperatore in vnum cum San-  
cta Catholica Romana CHRISTI Ecclesia decima ter-  
tia vice conuenit. Ibi quoque ad baptismum quidam Tar-



tari Principes perducti, Rodulfoq; Comite in Imperatorè  
delecto, & confirmato, plurima pro ritu Conclauis ad tol-  
lendas diuturnas Patrum discordias, pro Terræ Sanctæ  
subsidio,

subsidio, ac rebus alijs ad fidem, & Rempubicam Christianā, non minus rectè gubernandā, quā latius propagandā, maximè necessarijs Decreta sancita sunt; quorum Decretorum magna, & præcipua pars in Decretalium Sexto conscripta reperitur. Ibi præterea ab ipso Pontifice GREGORIO Cardinales creatos non ignoramus eundem S. BONAVENTURAM Episcopum Albanensem ordinis Fratrum Minorum, Vicedominum de Vicedominis Placentinum sororis filium, eiusdem ordinis, Episcopum Prænestinum: Ioannem pariter Vicecomitem Placentinū eius affinem; nec non Petrum de Tarantasio Gallum, & Petrū Iuliani Lusitanum, probitate omnes, & doctrina præstantissimos viros: quorum postremi duo deinceps ad Petri solium euecti, Innocentius ille V. hic Ioannes XX I. sunt appellati. Demum absoluto Concilio, cum optimus, sapientissimusque Pastor à Gallia Romam rediret, in Etruriam transfretus Aretij 4. Idus Ianuarij 1275. sanctitate plenus, magnocum omnium luctu migravit à vita. Eius Corpus in Aretina Ecclesia sepultum est, vbi iam multis miraculis fulget ex probata Historicorum omnium relatione, & ex Chronicis Franciscanorum par. 2. lib. 2. cap. 7. & 11. & lib. 4. cap. 1. ac etiam ex S. ANTONINI Florentiæ Archiepiscopi verissimo testimonio in tertia Chronicorum parte tit. 20. cap. 2. Vt autem summæ erga hunc locum obseruantię suæ memoriam apud posteros diuturnam, & penè immortalem redderet, idem gloriosus Pontifex, nunquam satis dignè laudatus, cum adhuc esset in terris, sacram hanc Aedem maiorem in modum auxit, ornavitque tum sacris quibusdam indumentis, quæ maximè relata videbis in sacræ suppellectilis libro Idibus Maij 1346. descripto per Ioannem de filijs Michaelibus notarium, tum etiam perpetua ab ipso erecta Præbenda, quæ Diui Papæ GREGORII dicitur,



tur, annexa modò Diaconali Mansionariæ de Puteo pagano, vt perspicuè docet egregij viri Ioannis Petri Dordoni Notarij publicum monumentum 12. Calen. Iulij 1601. confectum.

*Azonis Præpositi, Cardinalis optimi commemoratio gratissima.*

AZONEM addo S. ANTONINI Præpositum ab Innocentio Pontifice Secundo Diaconum, mox S. Anastasiæ Presbyterum Cardinalem creatum; quem nihilominus tamen Præposituram ipsam adhuc retinuisse, atq; hæc, quando in vita fuit, resedisse testantur non minus quam plurimæ ipsius Cardinalis, & Præpositi locationes, quas Inuestituras dicimus, vnâ cum Canonicis celebratæ, quæ in Archiuio ad perpetuam posteritatis memoriam extant, eiusq; manu subscriptæ, per Azonem, ac Obertum sacri Palatii, notarios conscriptæ ab anno 1120. ad annum vsque 1140. quàm etiam plumbo consignatæ literæ ipsius Innocentij Papæ, quas ad Canonicos scripsit de morte eiusdem Azonis Cardinalis, & Præpositi in hæc verba.

*INNOCENTIUS Episcopus seruus seruorum DEI Dilectis filiis Canonicis S. ANTONINI Placentiæ salutem, & Apostolicam benedictionem.* De morte quidem carissimi filij nostri Azonis Presbyteri Cardinalis Præpositi vestri tanto amplius condolemus, quanto magis personam eius arctius amabamus, atque in ipsius obitu maiora S. R. E. et nobis obsequia sunt subacta. Verum, quia in causa huiusmodi vna nobis restat consolatio Saluatoris, Vniuersitatem vestram hortamur in Domino, quatenus in pietate, & concordia persistatis, atque idoneam personam inuocata Spiritus Sancti gratia vobis in Præpositum eligatis, per cuius industriam ipsa Ecclesia DEO propitio rectè valeat gubernari, vosque sub eius regimine tam spiritualiter, quàm temporaliter proficere valeatis: hoc scientes, quod personæ & locum vestrum affectione paterna diligimus, & in quibus expedit, vobis consilium, & auxilium auxiliante Domino exhibebimus. Datum Romæ 5. nonas Octobris.

C Pro

Pro cuius Azonis anima legatum illud habemus, quod idem Obertus Notarius à Ioanne Presbytero donatum 9. Cal. Martij 1141. testatum reliquit. Ab ipso autem Azone Cardinali eiusdem Innocentij iussu Basilicam Ferrariæ, quam Gulielmus Adelardus Ciuitatis Princeps ædificauerat, consecratam refert Carolus Sigonius anno 1135.

*Petri Diani Canonici, deinde Præpositi, similiter Cardinalis, & Legati honorifica mentio.*

PETRUM etiã Dianũ Placentinũ, qui primũ sacri huius loci Canonicus, deinde Præpositus extitit, ex certissimis scripturis publicis Gerardi, & Ricardi, Alberti de Trauazano, Alberti de Castello, Petri Sauini, & Ioannis de Monte pariter sacri Palatii Notariorum ab anno 1162. ad annum vsque 1186. Veronæ Cardinalem Diaconum S. Nicolai in carcere à Lucio III. Pont. 1184. & à Clemente III. Presbyterum S. Cæcilie creatum 1188. inspicere est apud Onuphrium Panunium, vbi de Cardinalibus agit.

*De Decreto exemptionis Ciuitatis Placentinæ.*

CvI. quidem optimo, & præstanti viro quantum honoris deferre, quantamue gratiam in omne tempus habere debeat hic locus; imò tota Ciuitas, & Ecclesia ipsa Placentina, ex eo maximè dijudicari potest, quod, cum amplius septingentos nouem, ac viginti annos Metropoli Rauenennæ olim addicti & obstricti essemus, ipse in hoc vnum incubuit, plurimumque laborauit, vt iam soluti, ac semel in veterem libertatem vindicati, eius ope, & opera exemptionis munere perpetuo frueremur, ex literis, quas de Decreto eiusdem exemptionis nostræ ab ipso Petro Cardinali Præposito scriptas inuenimus sub hac forma:

Venerabili in CHRISTO Patri Tedaldo DEI gratia Episcopo  
Placentino, & Maioris Ecclesiæ, & S. ANTONINI Cano-  
nicis, & Archipresbytero, & Consortio Capellanorum, Petrus ea-  
dem gratia S. Nicolai in carcere Diaconus Cardinalis, & S. AN-  
TONINI Præpositus Salutem in salutis auctore. Prudentiam  
vestram nosse volumus D. Gulielmum Rauenmatem Archiepiscopum,  
virum utiq; providum, discretum, ac literatum, & multis virtuti-  
bus præditum frequentissimam de Episcopo, Clero, & Populo Pla-  
centino deposuisse querelam, in cuius depositione assidue perseverat  
asserens Ecclesiam suam aduersus vos multis privilegijs esse muni-  
tam, & contra asseuerans vos nullam omnino habere defensionem.  
Nos verò hac audientes, & pro defensione nostræ Ciuitatis bono-  
ris sollicitè vigilantes Registra Summorum Pontificum diligenti in-  
dagatione perquisimus, & in Registro Beatissimi Paschalis II. De-  
cretum exemptionis Ciuitatis nostræ à iugo Rauenne inuenimus, cuius  
Decreti tanta est auctoritas, quantum si esset privilegium manu D.  
Papæ signatum, & bulla munitum, & Cardinalium subscriptione  
roboratum. Præfati Decreti verba sunt hæc, Anno Incarnationis  
Domini 1106. celebravit Dominus Papa Paschalis Concilium &c.  
Hæc quidem vobis scribimus non consultantes, vt causam intretis,  
Sed vt ea in Archivis, & memoria habeatis, & posteris relinqua-  
tis, vt si sortè aliquando contigerit Ciuitatem nostram non posse  
declinare iudicium, præsentis Decreti beneficio vtatur, & privile-  
gio defendatur.

Alia item eiusdem Petri Dianj Cardinalis facta  
memorabilia.

IDEM Petrus Cardinalis Dianus S. Romanæ Sedis in  
Lombardia Legatus cum esset, in Monasterio S. SAVINI,  
Cleti, consulum, & totius Placentini Populi rogatu ele-  
ctionem Arditiōis in Episcopum Placentiæ factam con-  
firmavit 5. Cal. Iulij 1192 postea nobilissimū tapetem ab  
Henrico quondam Friderici Imperatoris filio receptum  
anno 1193. donasse fertur huic eidem Basilicæ; in qua  
etiam Canonicalem Præbendam XV. instituit, Grimerio

Placentino Episcopo in suo diplomate Statuti de XV. Canonicorum numero editi id affirmante ; quod idem planè confirmavit & Iacobus Bagarotus Capociacæ Archidiaconus, ac S. ANTONINI Canonicus, qui olim 6. Calen. Octobris 1221. per publicum Gulielmi Cogni notarij documentum ad breuiaturas ( ut ipsorum notariorum verbo utar ) Ioannis de Superclo eidem huic celeberrimo loco fundum in Rosoleto donauit pro anima Petri Cardinalis quondam auunculi sui, pro se, parentibusque suis ; ad incrementum Præbendæ ab ipso Petro Cardinali erectæ.

*Aliorum quoque Cardinalium, Episcoporum, ac Prælatorum, & nobilium virorum hoc in Templo olim Canonicorum celebris memoria.*

ADDO præterea hîc Angelum Acciaiolum S. Laurentij in Damaso Cardinalem Florentiæ nuncupatum eandem ipsam de Lugagnano Præbendam obtinuisse ab anno 1375. ut aliam quoque de Suzano ( quam priùs 1379. Thomas SS. Nerei, & Archillei Presbyter Cardinalis adeptus fuerat, ) ab anno 1383. usque ad 1403. Eodem etiam tempore F. Angelum de Anna Cardinalem de Laude illam de Potentiano, quam deinde habuit Cardinalis Bernardinus de Lunate Papiensis 1493. Alium item Bernardinum S. Crucis in Hierusalem Legatum à Latere illam de Burgeto 1502. quam etiam Petrus Cardinalis Rheginus S. Ciriaci in Thermis consecutus est anno 1507. Nec non similiter Ioannem Baptistam Cicadam S. Clementis Cardinalem Præposituram ipsam obtinuisse 1555. Quòd si Episcopos, & Archiepiscopos quæras, intelligere licet hinc olim Bernardum Rondanum Placentinum Iurisconsultum Ecclesiæ huius Præpositum ad Archiepiscopatum Saldiniensem ; Ioannem Surdum ( de cuius munere CHRISTI Coronæ SPINAM venisse supra demonstratum est ) itidem Placentinum

centinum Præbendę de S. Georgio Canonicum ad Episcopatum Vachiensem per Vrbanum V. assumptos fuisse 1363. sic ante illos Albericum Vicecomitem 1294. Placentinum huius quoque Templi Canonicum ad S. Placentinā Sedē euectum. Deinceps verò Ioannem Mundanum Decretorum Doctorem, & Baptistam Bagarotum Placentinos hîc etiam Canonicos, nempe hunc ad illam de Farnarina 1503, & illum ad aliam de Râio 1470 Bobiensis Ecclesię præfectos, & qui adhuc viuit, Ioannem Andream Calegarium Episcopum Britonoriensem ad eam de Potentiano Canonicum extitisse 1565. ad quorum etiam confirmationem non desunt, quæ videas, publica Notariorum monumenta præsertim Benedicti de Filijs Michaelibus 1362. 8. Idus Augusti, 1363. 11. Cal. Augusti, & 5. Idus Februarij, 1364. 4. Nonis Octobris, 1365. Nonis Aprilis 1366. 4. Nonis Martij, 1379. 11. & 7. Cal. Februarij, 1380. Cal. Martij, Antonij de Sariano 1388. 14. Cal. Februarij 1389. 17. Cal. Decembris, & 13. Calen. Martij, 1391. 3. Non. Decembris, Ioannis Iacobi Ritii 1482. Pridie Idus Septembris, Antonini Romignani 1493. 8. Cal. Februarii, 1502. Cal. Decembris, 1507. 3. Idus Octobris, & Cal. Martij, 1508. 4. Idus Nouembris, & Innocentii Nibii 1555. Pridie Calen. Ianuarii. Mitto autem breuitatis gratia quamplurimos alios Prælatos, innumerabiles Romanorum Pontificum, quos vocant Capellanos, familiares, cubicularios, sacri Palatii Auditores, & id genus alios, qui quondam Canonici, complures etiam Placentini non tam spectata generis dignitate, quàm præclaris moribus, & doctrina locum hunc apud omnes mirandum, memorabilem, celeberrimumque reddiderunt. Taceo Ioannem, Guidonem, Gulielmum, & alios familiariâ Porta Canonicos, nobiliores, & affines S. GERARDI à porta Placentini. Hic olim Potent-

Potentia in Apulia ( vnde nobiles ipsi Porta cognomen etiam de Pulia deducunt ) Episcopus multis virtutum, & miraculorum signis adeo claruit, vt à Callisto Pontifice II. in



Sanctorum numerum deinceps relatus apud illos Populos honorifice colatur, eiusque dies festus solennis ibi 3. Cal. Nouembris quotannis celebretur. Nihil dicam de Grimerio, & Bonifacio Vicecomitibus Canonicis 1268. & 1297. ipsius B. Papæ GREGORII DECIMI propinquis, & necessariis. Nihil de Philippo Vicedomino Vicedomini Cardinalis Prænestini nepote, qui, cum Senonensis Ecclesiæ Canonicus esset, in Præpositum S. ANTONINI electus fuit 1275. nihil de Landulfo Iulano Alexandri III. Pontificis consanguineo, & scriptore 1260 Canonico: nihil denique de Alberto, Oberto, ac Ioanne Dianis Petro quondam Cardinali Præposito coniunctis pariter Placentinis, hicq; Canonicis 1175. 1194. & 1253.

*Indulgentiarum munera, & concessiones perpetua.*

Quo verò maiori religione, ac animi pietate Fideles ad hunc

hunc locū verē sanctum, verē Deo dicatum sæpius inuisendum promptiores fierent, Omnibus quidem ipsum piē Visitantibus in S. Martyris ANTONINI Vigilia, & solenni die Septem annorum INDVLGENTIAM perpetuis duraturam temporibus concessit Iulius II. anno 1512. 4. Nonas Augusti. Similiter eodem die mille annos Indulgentiæ, & alijs temporibus centum Leo X. anno 1513. 11. Cal. Augusti; præter alias Clementis VII. aliorumque Pontificum, maximas, & diuersas largitiones, quæ in libro Privilegiorum huius Templi descriptæ reperiuntur. CLEMENS quoque VII. quem hodie Summum Pontificem summa & animi vigilantia, & rerum prosperitate pro DEI Ecclesia dies, noctesque laborantem habemus, & admiramur, eandem sacram hanc Aedem per quinquennium in Feria 5. Cœnæ Domini, & in festis Natalitijs diebus Sanctorum ANTONINI, & OPILII, Septem annorum, & totidem Quadragenarum munere cumulauit anno 1602. 9. Calend. Iunii, vt ex eius diplomate videre est, cuius illustre procemium non esse hic omitendum censi, cum maximè ad rem nostram faciat sub his verbis.

CLEMENS Papa VIII. Vniuersis CHRISTI Fidelibus præsentem literas inspecturis Salutem, & Apostolicam benedictionem.

Ad augendam fidelium religionem ac deuotionem, per quas eorum salus æterna comparatur, cœlestibus Ecclesiæ donis propositis Fideles ipsos libenter inuitamus. Sanè cum, sicut accepimus, Ecclesia Collegiata S. ANTONINI Placentiæ, quæ in ea Ciuitate valde insignis, & post Cathedralē alijs dignior existit, sacris præsertim eiusdem S. ANTONINI Martyris ex gloriosa militum Thebaorum legione Placentiæ Patroni, & defensoris, nec non Sanctorum CASTI, & DESIDERII Martyrum, ac S. VICTORIS primi ipsius Ciuitatis Episcopi & Confessoris ac S. OPILII Diaconi Placentini & Confessoris corporibus ibidem quiescentibus decorata existat. Vnaque ex SPINIS Coronæ Domini nostri IESU CHRISTI ac partē Brachij cum ma-

*nu, & digitis pueri ex Sanctis Martyribus Innocentibus ab Herode crudelissimo Rege interfectis similiter, vt pie creditur, ornata resul-  
geat. Nos, vt de cetero Ecclesia prædicta in maiori veneratione habeatur, & CHRISTI Fideles eò libentius deuotionis causa, ad illam accedant, quò ex hoc cælestis gratiæ donis prædictis vberius se conspexerint esse refectos, de omnipotentis DEI misericordia &c.*

*Visitantibus verò Altare maximum 8. Idus Maii, quo die illud dedicatum, & consecratum est, 40. dies Indulgentiæ singulis annis donauit Illustrissimus Cardinalis PHILIPPVS Segæ tunc Placentiæ Episcopus 1583.*

*His igitur, LECTOR, intellectis huic sanctæ & venerandæ Basilicæ etiam atque etiam gratulare, talem, actantam ipsius dignitatem extolle; DEVM OPTIMUM MAXIMUM in Sanctis suis mirabilem suppliciter, assidueque roga, vt quorum maximè gloriam hinc admiraris, plurimas, ac præstantissimas eorum actiones rectè consulendo, fortiter sustinendo, iuste, & piè viuendo, tibi etiam felicissimè persequi, & imitari concedat.*

*Vale in Domino.*



*Conceditur, vt publicetur, ac imprimatur.*

*Fr. Bonif. d<sup>i</sup> Vigleuano Inquisitor Placentiæ.*

*Ceccolinus Margarutius Vicarius Generalis.*







